

Christliche Leichpredig.

Man sol auch in Glauben vnd Religions sachen / nit auff den grossen hauffen der Menschen sehen / dan der Herz Christus bezeuget / das der grosse hauff den breiten Weg zur Verdammus gehet / Matth. 7. Cap.

Auch solt du in Glauben vnd Religions sachen nicht auff deine Eltern / auff Vatter vnd Mutter sehen / dann kan ich vnd du irren / wann wir ausser Gottes Wort etwas thun / ey so habens unsere Eltern auch geköndt / wann sie nit auff Gottes Wort gesehen haben / dannes steht geschriben: Alle Menschen seind Lügner / Gott allein ist warhafftig / im 116. Psalm / vnd Röm. 3. Derhalben soll man den Glauben auff Gottes Wort gründen / vnd keines wegs auff die Eltern / wie Gott der Herz selbst sagt / Ezechielis 20. Ihr solt nach ewerer Väter Gebotten nit leben / ihr Recht solt ihr nicht halten / vnd an ihren Gözen euch nicht verunreinigen / dann ich bin der Herz ewer Gott: Nach meinen Gebotten solt ihr leben / Meine Rechte solt ihr halten / vnd darnach thun. Die H. Apostel haben in dem Glauben nit auff ihre Eltern gesehen / sondern auff den Herrn Jesum / vnd auff sein H. Euangelium / wie zu sehen Matth. 4. Io. am 6. Die Seelige Leuth sind das / welche durch der Apostel wort / an den Herrn Jesum glaubē: für die bittet der Sohn Gottes / Joh. 17. Aber von denen / die auff ihre Eltern vnd auff andere menschen sehen / sagt der Sohn Gottes / Luc. 14. Cap. Wer zu mir kompt / vnd hasset nicht seinen Vatter vnd Mutter / Weib vnd Kind / Brüder vnd Schwester / darzu sein eygen Leben / der kan nicht mein Jünger sein.

Zum Andern / vernemmet auch / wo vnd bey wem die Feinde Pauli ihn angeklagt haben / nicht allein auff ihren Cankeln / vnd bey iren zuhörern / sonder auch vor der Weltlichen